

# 新元史

列傳

第一百零八至第一百一十三

第伍拾貳冊

列傳第一百八

新元史卷之二百十一

賜進士出身日講起居注官翰林院侍讀國史館纂修膠州柯劭忞撰

貢奎師泰

王守誠

李好文

李尤魯翀遠

蘇天爵

吳直方萊

楊瑀

遂魯曾曾福冲  
劉聞

張翥

周伯琦

孔克堅

貢奎字仲章其先大名滿城人後徙甯國宣城奎十歲能屬文及長博通經史浙江行省檄爲池州齊山書院

山長大德六年授太常奉禮郎兼檢討上疏言先王制禮雖節文有經而本誠貴質惟不蔽於禮之文而得其意則可以對越而無歉不然繁爲之節無當也朝廷多採其議九年遷翰林國史院編修至大元年轉應奉翰林文學預修成宗實錄丁父憂服闋除江西等處儒學提舉吏逮數人至持公牘請奎署曰是學校報事遲誤者奎曰吾以天子命提舉儒學職在教何以刑爲立命釋之乃書其坐屏曰讀書之中日有其益飲水之外他無所求與諸生揖讓周旋如師弟子禮士論翕服五年遷翰林院待制預修仁宗實錄書成賜幣有差至治元

年以母老乞養歸泰定三年復起爲翰林待制拜集賢直學士階奉訓大夫天厯元年奉命祀北岳南鎮及淮濟瀆二年至會稽以疾卒年六十一著有詩文集百二十卷元統元年贈翰林直學士太中大夫輕車都尉追封廣陵郡侯諡文靖子師泰

師泰字泰甫肄業國學爲諸生天厯元年選授太和州判官累遷江浙行省掾以中書檄不得用部下士爲掾自劾去尋以大臣薦擢應奉翰林文字同知制誥兼國史院編修官丁內艱服闋除紹興路總管府推官山陰白洋港有無主船漂抵岸史甲等取其篙櫓船有死人

二徐乙見之疑爲史甲所殺告於官吏傭富民家並逮  
繫富民師泰密訪之則沈丁船以盜魚爲漁人所殺者  
其冤遂白巡鹽徐裕奪諸暨商所賣錢殺之走白縣我  
獲販私者其人畏罪投水死師泰覆案之具得裕殺人  
狀餘姚孫國賓以捕盜獲姚甲造僞鈔受其賂縱之誣  
執良民師泰訊得實姚處死孫亦就法其審斷之明多  
類此治行爲諸郡第一至正六年復入爲翰林應奉文  
字預修遼金宋史八年遷授經郎兼經筵譯文官九年  
擢翰林待制進講經筵明君子小人之辨帝悅錫賚甚  
厚十年改國子司業擢禮部郎中遷吏部拜監察御史

自世祖以後省臺不用南人及是始復舊制南人復爲省臺官自師泰始至正十二年除吏部侍郎旋調兵部巡視口北十三站驛戶均其徭役豪強懾服十四年除都水庸田使和糴浙西以供軍儲庸田司罷擢江西廉訪副使未行再擢福建廉訪使又改兵部尙書旋授平江路總管十六年張士誠陷平江師泰懷印綬遁去士誠降浙西行省丞相達識帖木兒承制授師泰兩浙都運鹽使再除江浙行省參知政事十八年改戶部尙書詔以閩鹽與糧由海道運至京師皇太子書務本二字賜之二十年召爲秘書卿二十二年行至杭之海甯以

道阻遂寓於海甯自名其里爲小桃源元亡宋濂邀之  
出師泰爲置酒飲罷仰藥而卒年六十五師泰工詩文  
尤長於吏治所至有名績著玩齋集十卷

王守誠字君實冀甯陽曲人少好學從鄧文原虞集游  
泰定元年進士第一授秘書郎遷太常博士續纂太常  
集禮轉藝林庫使與修經世大典拜陝西行臺監察御  
史改奎章閣鑒書博士遷監察御史出爲山東廉訪司  
僉事累遷禮部尙書與修遼金宋三史擢中書省參議  
出爲燕南北道廉訪使至正五年拜河南行省參知政  
事偕大都留守答而麻識里宣撫四川銅梁尹張文德

捕斬盜魁得懷中旗書曰南朝趙王其黨聚眾焚掠雙  
山文德又捕百餘人重慶知府以私憾誣之議文德罪  
比不卽捕強盜例加四等會遇赦尙欲杖一百七守誠  
至爲直其事疏言四川官吏祿薄請以戶絕田及屯田  
之荒者召人耕闢收其租以贍之宜賓尹楊濟亨請建  
憲宗神御殿於蟠龍山儒學教授謝進賢請復文翁石  
室爲書院守誠據以入奏皆從之進資政大夫河南行  
省左丞未抵任卒年五十四賜鈔萬錠諡文昭  
李好文字惟中大名東明人父永貞國子伴讀好文少  
貧力學夜就鄰家磨房燈讀書一日貸村嫗米嫗訕其

弗耕好文曰我目耕耳時人爲語曰目耕夜分李好文  
登至治二年進士第授濬州判官入爲翰林國史院編  
修國子助教泰定四年除太常博士會盜竊太廟神主  
好文言在禮神主當木爲之金玉祭器宜貯之別室又  
言祖宗建國以來七八十年每遇大禮皆臨時取辦博  
士徒循故事相應答耳往年詔爲集禮乃令各省及各  
郡縣置局纂修宜其久不成禮樂由朝廷出郡縣何有  
焉請長院者選僚屬數人仍請出架閣文牘以資擇錄  
從之二年書成凡五十一卷名曰太常集禮遷國子博  
士丁內憂服闋起爲國子監丞拜監察御史時復以至

元紀元好文言年號襲舊古所未聞襲名祛實未見有  
益因言時弊遜于至元者十餘事朝廷雖是之終弗能  
用好文錄囚河東有李拜拜殺人而兇器不獲懸十四  
年好文曰不決之獄有如是久者立出之王傅撒都刺  
以足蹋死人眾謂殺人不用刃當杖好文曰怙勢殺人  
甚於刃况因有求而不遂乎卒論死一道震懾出僉河  
南浙東兩道廉訪司事六年帝親享太室召僉太常禮  
儀院事至正元年除國子祭酒好文言宜親祀孔子帝  
納之會丁夜有御史中丞入禮殿國子生阻之明日中  
丞使刑曹訊其事好文曰中丞不察其由何施鞭朴耶

却之丞相以聞中丞謝罪乃已改陝西行臺治書侍御史遷河東道廉訪使三年郊祀召爲同知太常禮儀院事帝親祀太廟乘馬至裏橋弗下眾不敢言好文前跪白皇帝宜下馬帝乃下馬至甯宗室遣阿魯問曰兄拜弟可乎好文與博士劉聞對曰爲人後者爲之子也帝遂拜由是每親祀必命好文攝禮儀使四年除江南行臺治書侍御史未行改禮部尙書與修遼宋金史除治書侍御史俄除參議中書省事視事十日仍爲治書與修史又遷陝西行臺治書侍御史獨署臺事時王守誠奉使四川以私仇誣廉訪使曾文博僉事烏馬兒王武

文博免官卒烏馬兒誣服武不屈以輕侮抵罪好文曰  
奉使代天子行事當問民疾苦黜邪陟正今行省以下  
未聞舉劾一人獨風憲之司無一免者豈正大之體率  
御史力辯武等之枉并劾守誠不法十餘事時論直之  
六年除翰林侍講學士兼國子祭酒遷集賢侍講學士  
仍兼祭酒九年出爲湖廣行省參知政事湖北道廉訪  
使尋召爲太常禮儀院使帝以皇太子年漸長開端本  
堂命入學以右丞相脫脫大司徒雅不花知端本堂事  
命好文以翰林學士兼諭德好文力辭上書於脫脫曰  
三代聖王莫不以教世子爲先務蓋傳經期以明道出

治在於爲學宜求道德之鴻儒拂成國家之盛事好文  
天資本下人望素輕驟膺重託負荷誠難脫脫以其書  
聞不許好文言欲求二帝三王之道必由於孔氏其書  
則孝經四書乃節其要略釋以經文又取史傳及先儒  
論說有關治體者加以所見效真德秀大學衍義例成  
端本堂經訓要義十一卷詔付端本堂令皇太子習焉  
好文又集歷代帝王故事總一百六篇一曰聖慧二曰  
孝友三曰恭儉四曰聖學又采歷代興亡治亂之迹名  
大寶龜鑑皆進呈於皇太子久之遷翰林學士承旨階  
榮祿大夫十六年復上書皇太子曰臣之所言卽前日

所進經典大意也殿下宜以所進諸書參以貞觀政要  
大學衍義等書果能推而行之何憂乎天下不治皇太  
子嘉納之然皇太子性好佛常謂左右曰李先生教我  
讀儒家書每不了了西僧教我佛經則一夕便曉也後  
屢引年乞致仕辭至再三拜光祿大夫河南行省平章  
政事仍以翰林學士一品祿終其身卒年七十

李朮魯翀字子翬鄧州順陽人其先隆安人金泰和中  
定女直姓氏屬望廣平祖德從憲宗南征因家于順陽  
以功封南陽郡侯父居謙辟江西行省掾生翀贛江舟  
中釜鳴者三人以爲異稍長卽勤學居謙卒家漸落翀

學益力自順陽徙居鄧州從州人李貞隱受學復往江西從新喻蕭克翁受學克翁有學行爲州里所敬嘗夢大鳥止其居翼覆于軒明日翀至翀始名思溫字伯和克翁爲易今名以符夢兆後復從京兆蕭𣪠及翰林學士虞集游學益進姚燧以書致貞隱曰燧見人多矣學問文章無與子輩比者於是貞隱以其女妻之大德十一年用薦者授襄陽儒學教諭遷汴梁路儒學正會修世祖實錄燧首以翀薦至大四年授翰林國史院編修官延祐二年擢河東道廉訪司經歷遷陝西行臺監察御史賑吐蕃飢多所建白五年拜監察御史時英宗未

出閣翀言宜擇正人以爲輔導帝納之尋劾奏中書參  
議元明善帝初怒不納明日乃命改明善他官而慰翀  
俄以御史巡撫遼陽勅給弓矢環刀後著爲令又往淮  
東察憲司官聲跡淮東憲司尙嚴刑翀取獄具焚之凡  
以吏進者例降二等從七品以上不得用翀言科舉未  
立人才多以吏進若一槩屈抑恐未足盡持平之議請  
吏進者止于五品從之除右司都事時宰相鐵木迭兒  
專事刑戮以復私憾翀因謝病去頃之擢翰林院修撰  
又改左司都事拜住爲左丞相使人勞翀曰今規模已  
定不同往日宜早至也翀爲強起會國子監隸中書俾

翀兼領之先是周王舉兵陝西府縣官多望吏議翀曰  
丞相曰此輩皆脅從宜宥之乃悉加銓叙帝方獵柳林  
駐故東平王安童碑下因獻駐蹕頌甚稱旨命坐賜飲  
上尊從幸上都次龍虎臺拜住命翀宣旨中書翀領之  
行數步還曰果命翀否拜住歎曰真謹密人也問謂翀  
曰卿可作宰相否翀曰宰相固不敢當然所學宰相事  
也夫爲宰相者必福德才量備始可當之拜住大悅觴  
翀曰非卿不聞此言迎駕至行在所翀入見帝賜坐擢  
右司員外郎預修大元通制書成翀爲序焉泰定元年  
遷國子司業明年出爲河南左右司郎中行省丞相曰